

二年秋八月中漸謹書

黃帝陰符經講義卷之一二同

雲峯散人夏元鼎宗禹撰

經曰觀天之道執天之行盡矣

天命之謂性率性之謂道道也者非可仰求於冥漠之表也天道在吾身我能盡其

觀之之妙則目擊道存至道不繁矣要當

執天之行須臾不離於十二時中一語一

默一呼一吸陰開陽關西沒東升風雲發

泄於七竅坎離交會於元宮天以是道而

運行乎萬化我以是道而操履於一身寒

暑同其往來日月與之交合乾健以之不

息日用自然無窮不知我之為天而天為

之我也所謂我命在我不在天其以是手

謂之盡矣不可以有加矣

天有五賊見之者昌

五賊者五行也人稟五行於天天有五賊

於人是豈天不仁耶非也行顛倒大道生

焉順則成人逆為丹用如金木必欲交并

水火必欲既濟土旺四季而復以尅水為

功是五行相賊道之玄奧世人安得見此

理乎故見之者昌亦誠則明明則著虛室

生白充實而有光輝之妙也既曰觀天之

道又曰見天之昌聖人揭大道以示人昧

者當面踐過惜哉

五賊在心施行于天

五行五賊其理幽微心為天君實能主宰

此施行于天皆在善心之用蓋心即天也

天即心也人能即一心之天以竊造化之

妙即動靜陰陽在常左右而施行之際未

知其孰為天孰為心也

宇宙在乎手

手為三關之要學道者當知所先矣黃庭

經曰口為心關精神機足為命關生地扉

手為人關把成衰得非以手者能按天象

方隅推五運六氣握固以養和彈指以攝

化診視以知陰陽之候訣目以通鬼神之

靈无一而不在手也宇宙六合廣大无際

苟得玄妙其猶示諸掌乎參同序曰運六

十四卦之陰符天關在掌是也

萬化在乎身

萬化在乎身

人之一身一天地也有陰陽升降有鳥兔出沒有潮候往來有風雨晦明有雷電轟閃有雲氣吐吞有山河流峙有草木榮枯動靜語默聞變化无一不與天相似信乎萬化所由生也然有道者萬化生无道者萬化息生者與天為徒而息者與鬼為隣也可不自愛乎

天性人也人心機也立天之道以定人也

天人一心機道同轍自六慾七情有以奪其性真則業識火熾不知其孰為天孰為人又孰為機孰為道也上聖洪慈闡明奧旨謂性即天也天即人也至理渾融不可致詰必得其機而應之則自然體合是機也豈世俗機巧變詐之為乎非也乃機絨之運不疾而速機關之應若合符節耳人能明此之機心同造化自然機應不失則天道立矣人道定矣固非曰捨人道而別立天道亦非曰先立天道而後定人道也蓋人道即天道天道即天機天機即天性所謂存其心養其性所以事天也

天發殺機龍蛇起陸地發殺機星辰隕伏人發殺機天地反覆天人合發萬化定基

三才異位生殺同機然殺者乃所以生之而生者乃所以殺之也且陰疑於陽必戰其血玄黃是殺機之所寓也况三陽交泰萬彙咸亨夫發殺機下除陰邪之蒸則雷轟雷掃天威赫然龍蛇蟄藏不容不起陸於陽盛之時地發殺機上承陽剛之運則湧泉起浪黃河逆流北斗杓躔不容不旋伏於陰陽交勝之際人識此機則潛奪造化旋乾轉坤翻天覆地使地天交而為泰生殺定而為功太白真人歌曰五行顛倒術龍從火裏出五行不順行虎向水中生反覆之機也雖然天地與人列為三才生殺與機同於一氣孟子曰我善養吾浩然之氣充塞乎天地之間亦豈捨吾身之外而別有天地可充塞乎故知一氣之運非以在天者有餘而在人者不足天人合發不差毫釐機絨默應變化萬端丹基一定大道滋生矣

性有巧拙可以伏藏

形色天性也而技巧出焉伏藏待時也而天機寓焉有是性則有是機非曰終於伏藏而无所用心也所謂懷材養浩明時正金丹之秘旨也或謂陰鉛主伏陽汞主飛聖人伏陽汞以鍊陰魄故有大巧若拙之用非也殊不知黃帝專言巧拙者在性伏藏者待時蓋以性則合於玄元而鉛汞則拘於形質苟此性靈明陽魂日盛巧拙莫藏伏藏待時天機一應則天性見矣此正洞賓謂七返還丹在人先須鍊已待時也知待時之說則知伏藏巧拙之性矣

九竅之邪在乎三要可以動靜

人身九竅上七下二無非邪穢學道者審此必攝乎三要然後動靜有元邪之思三要者何耳目口是也參同契云三寶固塞勿發揚三者既關鍵動靜不竭窮人能謹此三要則天下之聲萬變而坎之聰不為所奪天下之色萬變而離之明不為所蔽天下之味萬變而兌之納不為所亂自然

清明在躬志氣如神動靜之間一循天理之正雖萬邪不能干矣九竅之邪何有於我哉此正非禮勿視非禮勿聽非禮勿言之道豈異端乎

火生於木禍發必起姦生於國時動必濟知之修鍊謂之聖人

本能生火終於自焚國若生姦終於召亂此勢所必致之患學道者知之使火生於木而木不焚姦生於國而國不亂譬猶飲食男女人之大欲存焉固不可以其姦邪而屏絕之也苟縱是欲則何所不為惟以道而制之則火木相生不為禍而為福姦邪雖動不為邪而為正豈非聖人修鍊之道乎所謂居塵不染出死入生者也然木火相生於五行為最盛人身五行視木火為盛衰如真元不虧則木火熾然潛應天機常人縱之以傷生是輕命恣姦也聖人鍊之以成道是返歸正也苟真元衰敗則木火滅矣天道缺矣人道遠而鬼道近矣哀哉

黃帝陰符經講義卷之一

正一天師清微弟子 洪百堅 製作
道教學術資訊網站

黃帝陰符經講義卷之二

雲峯散人夏元鼎宗禹撰

經曰天生天殺道之理也

氣應黃鍾萬物萌動此天生也律中夷則則萬物擊斂天之殺也然天既生之而復殺之何也蓋有生殺之理存乎其間何以知生人能克是道於吾身密參造化則春生秋殺陰陽代謝不在一年之運而十二時中自可以奪天之妙用而得道之妙理矣

天地萬物之盜萬物人之盜人萬物之盜三盜既宜三才既安

天道好生地道好長人為萬物之靈萬物為人之用鳥可以為盜耶得非天地不仁以萬物為萬物是天地盜萬物而不使之長榮矣五色令人目盲五音令人耳聾五味令人口爽是萬物盜於人而不使之未茂矣斧斤之入山林數罟之入汚池五穀六蓄烹飪食啗是人為萬物之盜而不使之長生矣雖然三盜之暗相銷鑠潛互斷